

БЕШИНЧИ БЎЛИМ

ЎЗБЕКИСТОН РЕСПУБЛИКАСИ МЕХНАТ ВА АҲОЛИНИ
ИЖТИМОЙ МУҲОФАЗА ҚИЛИШ ВАЗИРЛИГИ
ЎЗБЕКИСТОН РЕСПУБЛИКАСИ СОҒЛИҚНИ САҚЛАШ ВАЗИРЛИГИ
ЎЗБЕКИСТОН РЕСПУБЛИКАСИ ХАЛҚ ТАЪЛИМИ ВАЗИРЛИГИНИНГ
ҚАРОРИ

**523 Корхона, ташкилот ва муассасалар тасарруфидаги
стационар болалар дам олдириш ва соғломлаштириш
оромгоҳлари базасида ташкил этиладиган дам олиш маскан-
лари ҳақидаги намунавий низомни тасдиқлаш тўғрисида**

*Ўзбекистон Республикаси Адлия вазирлиги томонидан 2014 йил
14 октябрда рўйхатдан ўтказилди, рўйхат рақами 2621*

Ўзбекистон Республикаси Вазирлар Маҳкамасининг 2012 йил 10 март-
даги 67-сонли «Болаларнинг дам олишини ташкил этиш ва соғломлаштириш
тизимини янада такомиллаштириш чора-тадбирлари тўғрисида»ги қарорига
мувофиқ Ўзбекистон Республикаси Меҳнат ва аҳолини ижтимоий муҳофаза
қилиш вазирлиги, Соғлиқни сақлаш вазирлиги ва Халқ таълими вазирлиги
қарор қилади:

1. Корхона, ташкилот ва муассасалар тасарруфидаги стационар болалар
дам олдириш ва соғломлаштириш оромгоҳлари базасида ташкил этиладиган
дам олиш масканлари ҳақидаги намунавий низом иловага мувофиқ тасдиқ-
лансин.

2. Мазкур қарор расмий эълон қилинган кундан эътиборан кучга ки-
ради.

**Меҳнат ва аҳолини ижтимоий
муҳофаза қилиш вазири**

А. АБДУҲАКИМОВ

Тошкент ш.,
2014 йил 28 август,
20 қ/қ-сон

Соғлиқни сақлаш вазири

А. АЛИМОВ

Тошкент ш.,
2014 йил 28 август,
16-сон

Ўзбекистон Республикаси қонун ҳужжатлари тўплами, 2014 й.

Халқ таълими вазири

У. ИНОЯТОВ

Тошкент ш.,
2014 йил 28 август,
51-сон

Ўзбекистон Республикаси
Меҳнат ва аҳолини ижтимоий муҳофаза
қилиш вазирлиги, Соғлиқни сақлаш вазирли-
ги ва Халқ таълими вазирлигининг 2014 йил
28 августдаги 20 қ/қ, 16 ва 51-сон қарорига
ИЛОВА

**Корхона, ташкилот ва муассасалар тасарруфидаги
стационар болалар дам олдириш ва соғломлаштириш
оромгоҳлари базасида ташкил этиладиган
дам олиш масканлари ҳақидаги
НАМУНАВИЙ НИЗОМ**

Мазкур Намунавий низом Ўзбекистон Республикасининг «Касаба уюшмалари, уларнинг ҳуқуқлари ва фаолиятининг кафолатлари тўғрисида»ги Қонуни ва Ўзбекистон Республикаси Вазирлар Маҳкамасининг 2012 йил 10 мартдаги 67-сонли «Болаларнинг дам олишини ташкил этиш ва соғломлаштириш тизимини янада такомиллаштириш чора-тадбирлари тўғрисида»-ги қарорига мувофиқ, корхона, ташкилот ва муассасалар (бундан буён матнда ташкилот деб юритилади) тасарруфидаги стационар болалар дам олдириш ва соғломлаштириш оромгоҳлари базасида ташкил этиладиган дам олиш масканларининг (бундан буён матнда дам олиш маскани деб юритилади) мақсади ва вазифаларини ҳамда улар фаолиятини ташкил этиш тартибини белгилайди.

1-боб. Умумий қоидалар

1. Болалар соғломлаштириш оромгоҳлари тўғрисидаги низомга (рўйхат рақами 2572, 2014 йил 7 апрель) мувофиқ, оромгоҳ ўз базасида дам олиш масканини ташкил этиши мумкин.

2. Мазкур Намунавий низом касаба уюшмалари, давлат органлари ва улар тизимидаги ташкилотлар тасарруфида бўлган оромгоҳлар, шунингдек касаба уюшмалари маблағлари йўналтириладиган бошқа оромгоҳлар базасида қонун ҳужжатларига мувофиқ алоҳида юридик шахс сифатида ташкил этиладиган дам олиш масканларига нисбатан татбиқ этилади.

3. Дам олиш маскани доимий равишда фаолият кўрсатади, дам олиш масканининг ўз фаолиятини болаларни соғломлаштириш мавсумида (июнь — август ойларида) вақтинча тўхтатиб туриш ҳоллари бундан мустасно.

4. Касаба уюшмалари, давлат органлари ва улар тизимидаги ташкилот-

лар тасарруфида бўлган оромгоҳлар, шунингдек касаба уюшмалари маблағлари йўналтириладиган бошқа оромгоҳлар базасида қонун ҳужжатларига мувофиқ алоҳида юридик шахс сифатида ташкил этиладиган дам олиш масканлари ушбу Намунавий низом асосида ишлаб чиқилган низомга эга бўлиши лозим.

5. Дам олиш маскани ўз фаолиятида Ўзбекистон Республикасининг Конституцияси ва қонунларига, Ўзбекистон Республикаси Олий Мажлиси палаталарининг қарорларига, Ўзбекистон Республикаси Президентининг фармонлари, қарорлари ва фармойишларига, Ўзбекистон Республикаси Вазирлар Маҳкамасининг қарорларига, ушбу Намунавий низом ва бошқа қонун ҳужжатларига амал қилади.

6. Дам олиш маскани ташкилот маъмурияти раҳбарлигида фаолият кўрсатади. Ташкилот касаба уюшмаси қўмитаси дам олиш масканининг ишини ташкил этишда фаол иштирок этади.

7. Ташкилот маъмурияти ва касаба уюшмаси қўмитаси дам олиш масканининг фаолияти ҳамда дам олувчиларга хизмат кўрсатишнинг сифати устидан назорат қилади.

2-боб. Дам олиш масканининг мақсади ва вазифалари

8. Дам олиш масканининг мақсади дам олувчиларга сифатли хизмат кўрсатишни самарали ташкил этиш ҳисобланади.

9. Қўйидагилар дам олиш масканининг вазифалари ҳисобланади:

дам олувчиларнинг дам олиши ва соғломлаштирилишини ташкил этиш;

дам олувчиларнинг бўш вақтларини мазмунли ташкил этиш;

дам олувчиларни ўзбек халқининг тарихий ва миллий анъаналари ҳамда маънавий қадриятлари билан таништириш;

дам олиш масканининг моддий-техник базасини мустаҳкамлаш.

Дам олиш маскани қонун ҳужжатларига мувофиқ бошқа вазифаларни ҳам амалга ошириши мумкин.

3-боб. Дам олиш масканининг фаолиятини ташкил этиш

10. Дам олиш маскани раҳбари ташкилот маъмурияти томонидан тайинланади ва озод этилади.

11. Дам олиш маскани раҳбари:

дам олиш маскани фаолиятига умумий раҳбарлик қилади;

дам олувчиларни қабул қилиш, жойлаштириш ва уларни дам олиш масканининг ички тартиб қоидалари билан таништириш бўйича ишларни ташкил этади;

дам олиш маскани фаолияти билан боғлиқ масалалар бўйича буйруқлар қабул қилади ҳамда дам олиш масканига юклатилган вазифаларнинг бажарилиши учун шахсан жавоб беради;

дам олиш маскани ҳужжатларининг тўғри расмийлаштирилиши, ҳисо-

ботларининг олиб борилиши ва белгиланган тартибда сақланишини назорат қилади;

дам олиш масканининг фаолият юритиши учун уни зарур бўлган жиҳозлар, техник воситалар билан таъминлайди;

дам олувчиларнинг мурожаатларини дарҳол кўриб чиқади;

дам олиш масканидаги мол-мулк ва бошқа моддий бойликларнинг сақланишини таъминлайди ва уларнинг сақланиши учун шахсан жавоб беради;

дам олиш масканининг ҳудуди, бино ва иншоотларини тегишли санитария, гигиена ва ёнғин хавфсизлиги талабларига мувофиқлигини таъминлайди;

дам олиш маскани ходимлари билан қонун ҳужжатларида белгиланган тартибда меҳнат шартномасини тузади, ўзгартиради ва бекор қилади.

12. Дам олиш масканида мазкур Намунавий низомнинг 1-иловасига мувофиқ шаклдаги Дам олиш масканларида дам олувчиларни рўйхатга олиш китоби ҳамда 2-иловасига мувофиқ шаклдаги Дам олиш масканларида дам олувчиларга кўрсатилган тиббий ёрдамни қайд этиш китоби бўлиши зарур.

Китоблар рақамланган, тикилган ҳамда дам олиш маскани раҳбари томонидан имзоланган ва муҳрланган бўлиши зарур.

13. Дам олиш масканига келган дам олувчи дам олиш масканининг қабул қилаётган ходимига ўзининг шахсини тасдиқловчи ҳужжати ва йўлланмасини тақдим этиши зарур.

14. Дам олиш маскани раҳбари дам олувчиларнинг ҳордиқ чиқаришлари ва саломатликларини мустаҳкамлашлари учун уларнинг ёши ва соғлигини инобатга олган ҳолда зарур шарт-шароит яратади, соғломлаштириш, маданий ва спорт тадбирларини ташкил этади ва саёхатлар уюштиради.

4-боб. Дам олиш масканининг ҳуқуқ ва мажбуриятлари

15. Дам олиш маскани қўйидаги ҳуқуқларга эга:

дам олиш масканининг ички тартиб қоидаларини бузган дам олувчини дам олиш масканидан четлаштириш;

дам олувчилар улар томонидан дам олиш масканининг мол-мулкига ва бошқа моддий бойликларига етказилган зарарни қонун ҳужжатларида белгиланган тартибда ундириш.

16. Дам олиш маскани қўйидагиларга мажбур:

дам олувчиларга сифатли хизмат кўрсатиш;

дам олиш масканининг ҳудуди, бино ва иншоотларининг тегишли санитария, гигиена ва ёнғин хавфсизлиги талабларига мувофиқлигини таъминлаш;

дам олиш масканини хўжалик, маданий ва спорт анжомлари билан жиҳозлаш;

дам олувчиларни сифатли озиқ-овқат маҳсулотлари билан таъминлаш;

ўз фаолиятини қонун ҳужжатларига ва мазкур Намунавий низомга риоя қилган ҳолда амалга ошириш.

Дам олиш маскани қонун ҳужжатларида белгиланган бошқа ҳуқуқларга эга бўлиши ҳамда мажбуриятларни бажариши мумкин.

5-боб. Дам олиш масканининг йўлланмаларини тайёрлаш ва сотиш

17. Дам олиш масканининг йўлланмаси дам олиш маскани томонидан мазкур Намунавий низомнинг 3-иловасига мувофиқ шаклда тайёрланади.

18. Дам олиш масканининг йўлланмалари қатъий ҳисобда турувчи ҳужжатлар бўлиб, ҳисобга олиш серияси ва рақамига эга бўлади.

19. Дам олиш масканининг йўлланмалари 12 кунга келиш-кетиш жадвалига мувофиқ берилади.

Дам олиш ва байрам кунлари учун 1 — 3 кунлик йўлланмалар ҳам берилиши мумкин.

20. Йўлланмалар шахснинг ўз ҳисобидан, ташкилот ёки касаба уюшмаси қўмитаси томонидан қонун ҳужжатларида белгиланган тартибда сотиб олиниши мумкин.

21. Дам олувчи томонидан йўлланмадан фойдаланиш имкони бўлмаса, йўлланма дам олиш муддати бошланишидан камида 3 кун олдин тегишли ташкилотга қайтарилиши лозим.

6-боб. Дам олиш масканининг молиявий-хўжалик фаолияти устидан назоратни ташкил этиш

22. Дам олиш масканларини сақлаб туриш харажатлари қуйидаги манбалар ҳисобидан қопланади:

йўлланмаларни сотишдан тушган маблағлар;

дам олувчиларга кўрсатилган хизматлардан тушган маблағлар;

ташкилот томонидан ажратиладиган маблағлар;

ҳомийларнинг маблағлари;

қонун ҳужжатларида тақиқланмаган бошқа маблағлар.

23. Дам олиш масканининг бухгалтерия ҳисоби ва ҳисоботи бухгалтерия ҳисоби тўғрисидаги қонун ҳужжатларида белгиланган тартибда амалга оширилади.

24. Дам олиш масканининг молиявий-хўжалик фаолияти мунтазам равишда, лекин йилига камида бир марта ўзи тасарруфида бўлган ташкилот маъмурияти ва касаба уюшмаси қўмитаси томонидан текширилади.

7-боб. Якуний қоидалар

25. Мазкур Намунавий низом талабларининг бузилишида айбдор бўлган шахслар қонун ҳужжатларида белгиланган тартибда жавобгарликка тортилади.

26. Дам олиш масканини ташкил этиш, қайта ташкил этиш ёки тугатиш қонун ҳужжатларида белгиланган тартибда амалга оширилади.

27. Ушбу Намунавий низом Ўзбекистон Республикаси Ички ишлар вазирлиги ҳамда Ўзбекистон Касаба уюшмалари Федерацияси Кенгаши билан келишилган.

Ички ишлар вазири

А. АХМЕДБАЕВ

2014 йил 25 август

*Ўзбекистон Касаба уюшмалари
Федерацияси Кенгаши раиси*

Т. НАРБАЕВА

2014 йил 25 август

Корхона, ташкилот ва муассасалар тасарру-
фидаги стационар болалар дам олдириш ва
соғломлаштириш оромгоҳлари базасида
ташкил этиладиган дам олиш масканлари
ҳақидаги намунавий низомга
1-ИЛОВА

523-модда

Дам олиш масканларида дам олувчиларни рўйхатга олиш
КИТОБИ

Т/р	Дам олувчининг Ф.И.О.	Туғилган йили	Иш жойи, лавозими	Шахсини тасдиқловчи ҳужжати маълумотлари (серияси, рақами, қачон, ким томонидан берилган)	Йўлланмасининг серияси ва рақами	Йўлланмада кўрсатилган муддат		Дам олган куни		Эслатма
						дан	гача	дан	гача	
1	2	3	4	5	6	7		8		9

Ташкилот маъмурияти

(Ф.И.О. ва лавозими)

Касаба уюшмаси қўмитаси:

(Ф.И.О. ва лавозими)

Корхона, ташкилот ва муассасалар тасарру-
фидаги стационар болалар дам олдириш ва
соғломлаштириш оромгоҳлари базасида
ташкил этиладиган дам олиш масканлари
ҳақидаги намунавий низомга
2-ИЛОВА

Дам олиш масканларида дам олувчиларга кўрсатилган тиббий
ёрдამни қайд этиш
КИТОБИ

Т/р	Тиббий ёрдам кўрсатилган сана	Тиббий ёрдам кўрсатилган дам олувчининг Ф.И.О.	Туғилган йили	Кўрсатилган тиббий ёрдām	Ташхис	Тиббий ёрдам кўрсатган тиббий ходимнинг Ф.И.О.	Тиббийёт ходимининг имзоси
1	2	3	4	5	6	7	8

Ташкилот маъмурияти

(Ф.И.О. ва лавозими)

Касаба уюшмаси қўмитаси:

(Ф.И.О. ва лавозими)

Корхона, ташкилот ва муассасалар тасарру-
фидаги стационар болалар дам олдириш ва
соғломлаштириш оромгоҳлари базасида
ташкил этиладиган дам олиш масканлари
хақидаги намунавий низомга
3-ИЛОВА

НАМУНА
(олд томони)

Дам олиш маскани
ЙЎЛЛАНМАСИ

тасарруфидаги дам олиш маскани
(ташкilot номи)

ЙЎЛЛАНМА

_____АА_0000001_____

(ҳисобга олиш серияси ва рақами)

Дам олиш маскани:

(номи)

Дам олиш масканининг манзили:

Йўлланма муддати _____ кун

20__ йил _____ дан _____ гача

Нархи: _____ сўм

Яшаш жойи учун йўлланма талони
(_____ кишига)

Дам олиш маскани:

(номи)

20__ йил _____ дан _____ гача

Дам олувчининг Ф.И.О.: _____

Бино: _____

Хона: _____

Талон берган шахс: _____

(имзо)

Йўлланманинг озиқ-овқат талони
(_____ кишига)

Дам олиш маскани:

(номи)

20__ йил _____ дан _____ гача

Стол: _____

Талонни бердим: _____

(йўлланма берган масъул шахснинг имзоси)

42 (646)-сон

— 27 —

523-524-моддалар

(орқа томони)

Дам олиш маскани йўлланмаси эгасининг Ф.И.О.: _____

Иш жойи: _____

Лавозими: _____

Оила аъзоларининг Ф.И.О.: _____

Йўлланма 20__ йил _____ берилди.

Йўлланма берилди: _____

(йўлланмани берган масъул шахснинг имзоси)

М.Ў.